



Prisebnošću policajaca izbjegnuta tragedija

# Hrabri Malkić, Hadžiabdić i Suljić spasili četiri života

Saobraćajna nesreća umalo završila kobnim posljedicama da nije bilo policajaca koji su odmah pritekli u pomoć unesrećenima



Od siline udarca vozilo odletjelo u kanal

Nerijetko radost blagdana u našoj zemlji pomute saobraćajne nesreće u kojima često bude i žrtava. Takav scenarij umalo se desio u noći drugog dana Kurban-bajrama u Bihaću, koji je okončan hepiendom zahvaljujući hrabrosti i prisebnosti trojice Bišćana.

## Odletjeli u kanal

Naime, u petak u večernjim satima u bihačkoj ulici Bedem automobil marke BMW austrijskih registarskih oznaka, kojim je upravljao osamnaestogodišnjak, udario je pješaka na trotoaru.

Nesretni pješak, za kojeg

se kasnije ispostavilo da je Goran Midžić, od siline udarca odletio je u kanal u koji se dijelom račva rijeka Una, a u kanalu je završio i automobil u kojem su se u tom trenutku, osim vozača, nalazile još dvije osobe.

Sreća je htjela da se u blizini mjesta nesreće nađu Edin Malkić, pripadnik Državne agencije za istrage i zaštitu (SIPA), te njegovi prijatelji Amir Hadžiabdić, pripadnik MUP-a USK, i Rasim Suljić, dobitnik ratnog priznanja „Zlatni ljiljan“.

Malkić, koji inače živi u Sarajevu, a blagdane je proveo u rodnom gradu, u izjavi




Automobil iz kojeg su policajci spasili unesrećene bio pod vodom

za „Avaz“ kazao je da su on i prijatelji čuli jak udar, a potom i svjedočili strašnom prizoru u kojem su unesrećeni završili u vodi. Bez razmišljanja, sva trojica su priskočila u pomoć.

## Skočio u vodu

- Odmah smo se spustili do kanala. Rasim je prvi skočio u vodu jer je u tom trenutku bio najpribraniji i najzalužniji je što smo spasili unesrećene. A ja sam pomagao vozaču i suvozačima da se izvuku. Onda smo pomogli Rasimu da pješaka izvučemo na obalu - ispričao je Malkić.

Ovaj hrabri čovjek ističe da ni on ni njegove kolege nisu pritekli u pomoć unesrećenima samo zbog činjenice da su policajci. Skrom-



**MALKIĆ:**  
**Dužnost je pomoći unesrećenome**

no ističe da je dužnost svakog čovjeka pomoći drugome u nevolji i da misli da bi to uradio i svako drugi na njihovom mjestu.

- To je dužnost svakog građanina i niko se ne bi trebao ni dvoumiti ni premissljati u takvim trenucima. Najvažnije je da se sve dobro završilo - kazao je Malkić.

Kako god, da ovi hrabri Bišćani u „pravo vrijeme nisu bili na pravom mjestu“, pitanje je bi li četiri života bila spašena. Pogotovo ako se zna da je povrijeđeni Midžić zadobio, kako je kasnije ustanovljeno, teške tjelesne povrede i da je spašen upravo stoga jer je brzo izvučen iz vode.

**S. DEGIRMENDZIC**

## Brza vožnja

Inače, u noći nesreće u Bihaću je padala jaka kiša, voda u kanalu je bila nabujala i hladna, ali se bihački heroji, riskirajući i vlastite živote, nisu

libili skočiti i zagaziti u kanal. Iz MUP-a USK su pojasnili da je do udesa došlo zbog neprilagodene brzine uvjetima na cesti.